

L V T Z E N B V R G V M.

orum, sita ad lævam Mosellæ ripam. A Carolo Magno institutam volunt, ut tertia imperii sedes esset per Germaniam Inferiorem.

*Bastonaicum*, aliter vocant *Parys en Ardenne*, quasi dicas Arduennensis Lutetia. Metalla ferri sunt haud procul à *Manderscheid*, in dominiis Keyla, Cronenberch, & Sleida, ad vallem, cui nomen est *Hellenthal*. Conflantur hoc loco ab istis Cyclopibus incudes, fornaces ferreæ, pyreteria, quæ per totam Germaniam & Belgium ingenti lucro distrahuntur.

*Novocastrum* etsi modicum, pulcrum satis est oppidulum. *Mommedium* in monte situm, cujus radices alluit flumen Chirfus. *Danvillerium* oppidum 12 Lutzenburgo abscedit milliariibus, bellis captum, direptum ac solo æquatum, posteaque restauratum. *Marvilius* ad eundem Chirsum est, quod pro altera sui parte Hispaniarum regem, pro altera Lotharingæ Ducem Dynastas agnoscit.

*Fanum S. Viti* oppidulum est peramœnum, uti & *Sleida*, muris carens, titulo Comitatus & insigni in aliquot pagos jurisdictione superbiens. *Martia*, vulgo *Mars en Famine*, nomen habet à Marte, oppidum mire antiquum.

Nobiles in tota hac provincia permulti, quorum numerum vix imminuerunt bella ista gravissima. Eorum ordinem ornant aliquot Imperatores ex iis profecti. Maximilianus Cæsar,

cum Carolo Burgundo succederet, factus est eadem opera hæres Lutzenburgii. Carolus quoque in ipso baptismi lavacro donatus est à patre Philippo titulo Principis Lutzenburgici. Sed de nobilium nimio rigore conqueruntur coloni: habentur enim pro servis: quod alioquin in nulla Belgii parte obtinet. Cetera sunt humani, laudis avidi, fidi, & virtutis amantes, laborum imprimis & inedia patientes. Henrico Imperatore ejus nominis septimo in Herruria defuncto, anno 1313, devolutum est jus hujus ditionis ad Wenceslaum Bohemiæ regem, Caroli IV Imperatoris fratrem. Post ejus obitum cessit jus Caroli IV liberis, Wenceslao & Sigismundo, qui in imperio ordine patrem sequuti sunt. Wenceslaus cognatam suam Elisabetham elocaturus Antonio Brabantæ Duci, has ei terras sponsales dedit. Antonius in Morinis adversus Gallos casus viduam uxorem reliquit, quæ Sigismundo Imperatore contra cives novamolientes evocato ad defensionem agri dotalis, à Burgundo restituta, vel potius adserta est. Post Elizabethæ excessum, vindicavit sibi has terras Philippus Burgundus, Dux Brabantæ. Carolus vero Audax transegit cum Isabella Casimiri Poloniæ regis conjugæ, unica Sigismundi Imperatoris hærede, redemitque pecunia litem. Ita ad Burgundos & Austriacos regio ista devoluta est.

